

Hvala Allahu, Gospodaru svjetova! Salavat i selam neka je na Allahova poslanika, Muhammeda, s.a.v.s., njegovu porodicu, ashabe i sve one koji ga slijede na putu islama!

Poštovana braćo i sestre, draga djeco i omladino, esselamu alejkum!

Sutra, ako Bog da, nastupa rebi'ul-evvel, mjesec u kome se rodio posljednji Allahov Poslanik, Muhamed, s.a.v.s. Zbog toga, tema današnje hutbe, pored mjeseca rebi'ul-evvela, je jedan poseban događaj koji se dogodio u godini rođenja Muhammeda, s.a.v.s..

Rebi'ul-evvel je treći mjesec u hidžretskom kalendaru. Za muslimane posebno je važan 12. dan u tom mjesecu jer se, kao što smo već kazali, povezuje sa rođenjem posljednjeg Allahovog poslanika Muhammeda, s.a.v.s..

Međutim, 12. rebi'ul-evvel, pored toga što je, prema većini učenjaka, datum rođenja Muhammeda, s.a.v.s, manje je poznato da je on na taj dan došao u Medinu i time okončao svoju Hidžru. Njegovo preseljenje na Ahiret dogodilo isto na taj datum. Uzvišeni Allah najbolje zna!

Međutim, sigurno je da su svi navedeni događaji obilježili i odredili ne samo povijest islama, već i

svjetsku.

U godini u kojoj je rođen posljednji Poslanik, s.a.v.s., dogodilo se čudo, koje je najavilo skore velike promjene u Arabiji i povratak korijenima Allahove vjere koje su još Ibrahim a.s. i Ismail a.s., uspostavili podigavši po Allahovoj naredbi Bejtullah – Kabu u Mekki..

Taj događaj započeo je namjesnik abesinskog kršćanskog vladara u Jemenu Ebreha, koji je izgradio u Sani veličanstvenu crkvu s namjerom da ona postane mjesto hodočašća svih Arapa. Tim potezom je htio ostvariti dva cilja: učiniti Sanu glavnim političkim i vjerskim centrom Arabije i privoljeti Arape da masovno prihvate kršćanstvo.

Arapski trgovci koji su posjećivali Sanu vidjeli su, međutim, u ovoj crkvi pravu uvredu, a prema Ebrehinoj velelijepoj crkvi pokazivali su otvoreno nepoštovanje, što je ovome izuzetno teško palo, te je odlučio povesti vojsku na Mekku, srušiti Kabu, a potom nametnuti Arapima kršćanstvo.

Iz Jemena je krenuo sa velikom vojnom silom, kažu od oko 60.000 vojnika. Sa sobom su, shodno predajama, vodili 9 ili 13 slonova. U nosiljci najvećeg, kojeg su prema nekim izvorima zvali Mahmud, sjedio je Ebreha. Neka arapska plemena

uspust su ih napala pokušavši spriječiti Abesince u njihovom naumu da dođu do Mekke, ali su brzo bili poraženi, a njihovi poglavari zarobljeni.

Tako je Ebreha bez većih problema i poteškoća došao pred Mekku. Mekkenlije su izašli iz grada i sklonili se u pećine na obližnjim brdima. Ebreha je zaplijenio kamile i stoku mekkenlija zatečenu pred gradom, te je tako zaplijenio i dvije stotine kamila koje su pripadale Abdul Muttalibu, djedu Muhammeda, s.a.v.s..

Kažu da je Abdul Muttalib, tada nezvanični poglavar Mekke, otišao u Ebrehin tabor i od njega zatražio da mu njegove kamile budu vraćene. Ebreha mu je na to rekao: *“Čudi me da ti kao uglednik i poglavar grada koga smo došli uništiti razmišljaš o svojim kamilama, a ne brineš za Kabu koju ćemo srušiti!”*

Abdul Muttalib mu je na to odgovorio: *“Ja sam vlasnik kamila i brinem se o njima, a i Hram ima svoga Gospodara koji će ga obraniti.”* Ebreha je uskoro naredio svojoj vojsci da predvođena slonom koji je trebao rušiti Kabu krene u grad. Kad je vojska stigla u dolinu Mahser, između Muzadelife i Mine, dakle, nadomak Mekke, Ebrehin slon zastade i leže. Nije mogao ustati da

krene prema Kabi. Prenosi se u predajama da su ga pokušavali dići na silu i nisu mogli. Međutim, kada bi ga povukli na koju drugu stranu, on bi odmah ustao.

Dok su se Ebreha i njegova vojska natezali oko slona, dogodila se mu'džiza, jer su nebo prekrile male ptice koje su izgledale čudno, kao da su balzamirane laste. Svaka je nosila po tri kamena: jedan u kljunu i dva u kandžama. Čim bi koji kamen pogodio nekog tijelo bi mu se počelo raspadati. Na sve strane vojnici su padali kao pokošeni od toga, sve dok nisu svi pomrli.

Međutim tu sudbinu Uzvišeni Allah, nije namijenio Ebrehi. Njemu je poslao bolest od koje su mu se počeli prvo raspadati vrhovi prstiju tako da kada je stigao u Sanu, bio sav okopnio. Tada mu srce otkaza i on umrije.

Ova godina među Arapima poznata je kao "Godina slona".

O ovom događaju govori kur'anska sura El-Fil: „Zar nisi čuo što je sa vlasnicima slona Gospodar tvoj uradio! Zar lukavstvo njihovo nije omeo, i protiv njih jata ptica poslao, koje su na njih grumenje od gline pečene bacale, pa ih On kao lišće koje su crvi istočili učinio!“ (El-

Fil, 1-5)

Poštovana braćo, nakon ovog poučnog kur'anskog kazivanja, preporučujem sebi i vama da u ovom mjesecu Mevluda pročitamo bar jednu knjigu o Poslaniku Muhamedu, s.a.v.s., i da na njega donosimo što više salavata i selama.

Muslimani u cijelome svijetu dočekaju Mevlud, rođendan posljednjeg Božjeg poslanika Muhammeda, s.a.v.s., kao milost i blagodat, naročito sada kada se suočavamo sa moralnim posrnućem čovječanstva i kad se skrnavi svako ljudsko dostojanstvo, čak od onih koji se predstavljaju kao muslimani.

Gospodaru naš, učini nas dostojnim sljedbenicima Muhammedovog, s.a.v.s., puta, učini Ga našim zagovornikom na Sudnjem danu i daj da budemo u Džennetu u njegovom društvu i društvu ostalih Tvojih pokornih robova!

Amin!

Split, 11.12.2015. Pripremio: Vahid ef. Hadžić  
Prethodne hutbe potražite na našoj stranici: [www.medzlis-split.org](http://www.medzlis-split.org)

ISLAMSKA ZAJEDNICA U HRVATSKOJ  
MEDŽLIŠ ISLAMSKE ZAJEDNICE SPLIT

EL-FIL

419